

Салық салу мәселелері жөніндегі консультациялық кеңес

Қазақстан Республикасы Премьер-Министрінің
2016 жылғы 29 қыркүйектегі № 90-ө өкімі.

Салық салу мәселелері жөніндегі консультациялық кеңес туралы ереже

1. Жалпы ережелер

1. Салық салу мәселелері жөніндегі консультациялық кеңес (бұдан әрі – Кеңес) Қазақстан Республикасы Үкіметінің жанындағы консультативтік-кеңесші орган болып табылады.

2. Кеңес қызметінің мақсаты салық заңнамасын жетілдіру жөніндегі ұсыныстар мен ұсынымдарды әзірлеу болып табылады.

3. Кеңес өзінің қызметінде Қазақстан Республикасының Конституциясын, "Салық және бюджетке төленетін басқа да міндетті төлемдер туралы" Қазақстан Республикасының Кодексін (Салық кодексі), Қазақстан Республикасының заңдарын, Қазақстан Республикасының Президенті мен Үкіметінің актілерін және Қазақстан Республикасының өзге де нормативтік құқықтық актілерін, сондай-ақ осы Ережені басшылыққа алады.

4. Қазақстан Республикасының Ұлттық экономика министрлігі Кеңестің жұмыс органы болып табылады.

5. Кеңестің отырыстары қажеттілігіне қарай өткізіледі.

2. Кеңестің міндеттері

6. Кеңестің негізгі міндеттері:

1) Қазақстан Республикасының салық салу жүйесін жетілдірудің негізгі бағыттары бойынша ұсыныстарды қарау және әзірлеу;

2) салық міндеттемелерін орындау барысында туындауы мүмкін түсініксіздіктерді, дәлсіздіктерді және қайшылықтарды жою жөнінде ұсыныстар әзірлеу;

3) салықты және бюджетке төленетін басқа да міндетті төлемдерді төлеуден жалтарудың ықтимал схемаларын жою жөнінде ұсынымдар әзірлеу болып табылады.

3. Кеңес қызметінің ұйымдастырылуы және тәртібі

7. Кеңес қызметінің ұйымдастырылуы және тәртібі Қазақстан Республикасы Үкіметінің 1999 жылғы 16 наурыздағы № 247 қаулысымен бекітілген Қазақстан Республикасы Үкіметінің жанындағы консультациялық-кеңесші органдар мен жұмыс топтарын құру тәртібі, қызметі мен таратылуы туралы нұсқаулыққа сәйкес жүзеге асырылады.